

Ekim ambil risiko tukar kerjaya

Oleh SITI NURAZLINA

JAMALUDIN

utusankelantan@utusan.com.my

JENAMA Zawara semakin dikenali para peminat fesyen muslimah kontemporari di negara ini. Siapa sangka, gadis kelahiran Pasir Puteh, Kelantan ini antara penyumbang kepada kejayaan bagi memastikan jenama pakaian tersebut terus dikenali ramai.

Walaupun masih ‘hijau’ dalam industri fesyen, namun Nurul Asyikim Zakaria (**gambar**), 25, atau lebih mesra dengan panggilan Ekim telah diberi kepercayaan untuk mengetuai pasukan pemasaran Zawara yang kini mempunyai 19 cawangan di seluruh negara.

Menurut siswazah lepasan Universiti Putra Malaysia (UPM), bidang pemasaran

adalah sangat asing buat dirinya, namun itu bukan penghalang kepadanya untuk mencuba sesuatu yang baru bagi mencari kepuasan diri.

“Di UPM, saya mengambil jurusan komunikasi (penyiaran). Selepas tamat pengajian pada 2013, saya bekerja dengan Bernama TV sebagai wartawan penyiaran selama dua tahun. Namun, siapa sangka saya mendapat tawaran mengetuai unit pemasaran di Zawara.

“Peluang yang diperoleh itu, saya terima walaupun tidak mempunyai pengetahuan tentang pemasaran. Keinginan menjadi ihsan yang mempunyai pelbagai ilmu pengetahuan membuatkan saya berani memikul tanggungjawab berat tersebut,” katanya kepada **S2** baru-baru ini.

Gadis yang gemar melayari internet pada masa lapang itu mengakui adakala timbul juga

perasaan takut dan tercabar apabila mengalas jawatan sebagai ketua pemasaran pada usia muda.

“Tapi saya selalu ingatkan diri sendiri, pada usia muda masa untuk belajar semua perkara dan jangan takut membuat kesilapan tanpa mencuba terlebih dahulu.

“Bagaimanapun, saya berasib baik kerana Ketua Pegawai Eksekutif, Kamarul Ariff Abd. Karim dan Pengasas Zawara, Dilla Abd. Karim sentiasa memberi tunjuk ajar selok-belok dunia perniagaan bagi merancang strategi pemasaran yang berkesan,” ujarnya yang mempunyai lima orang ‘anak buah’ di Zawara.

Di sebalik wajahnya yang lembut, Ekim mengakui dirinya seorang yang tegas walaupun orang lain akan melihatnya sebagai seorang yang selamba dan tenang.

Sikap yang dimiliki itu juga

membuatkan anak sulung daripada lima beradik itu sangat berdisiplin membahagikan masa antara tugas di Zawara dengan kerjaya sambilannya sebagai model pakaian muslimah.

“Walaupun ramai yang beranggapan menjadi model adalah mudah dan hanya perlu beraksi di hadapan kamera, saya pula merasakan sebaliknya. Dunia peragaan ini sangat mencabar dan paling penting, kita kena ada disiplin dan sikap yang baik.

“Bidang ini (peragaan) banyak mengajar saya untuk berkomunikasi dengan pelanggan yang mana turut membantu meningkatkan kemahiran dalam bidang pemasaran. Saya juga boleh melihat strategi pemasaran yang diguna pakai jenama fesyen yang lain,” katanya yang menceburi bidang peragaan sejak tiga tahun lalu.

info

Nurul Asyikim Zakaria

- » **Umur:** 25 tahun
- » **Asal:** Pasir Puteh, Kelantan
- » **Pendidikan:** Ijazah Sarjana Muda Komunikasi (Penyiaran), UPM
- » **Pekerjaan:** Ketua Pemasaran Zawara dan model sambilan
- » **Hobi:** Layari internet
- » **Adik-beradik:** Anak sulung daripada lima adik beradik